

獨

學

廬

文

稿

獨學廬文彙目錄

奏謝息訟安民論墨刻

奏謝全史詩函

奏謝金盒玉帶

奏謝平苗戰圖

奏報平定教匪

奏籌善後章程

奏清查軍功

奏報長壽縣士民捐修城工

奏海口工程

附錄

奏辦理團練

奏謝息訟安民墨刻

奏為恭謝

天恩仰祈

聖鑒事竊奴才奉到

欽賞

御製息訟安民論墨刻一分

御製弼教申謨墨刻一分謹恭設香案望

闕叩頭謝

恩祗領訖欽惟我

皇上心誠保赤

附錄
德洽好生

統仁育義正之全功兼道政齊刑之要術
寬猛惟人自取未許畸重而畸輕

溫肅協

天之心所貴有倫而有要且為政當先察吏息
事乃得寧人必使有司皆存明允之心然後小
民可絕譸張之習

道崇易簡申析言破律之誅

政貴誠和示弼教明刑之本誠公庭之留獄懲
貪吏之舞文此皆我

皇上慈惠為心時幾屢省欲庶職共知夫寅畏
故

聖謨不憚夫丁寧將見安民則惠一夫無不達
之情折獄惟良四海協咸中之慶奴才守土有
年牖民無術恭誦

宸章之雲縵益凜夙夜之冰兢惟有勤加考覈
先清聽訟之源勉竭愚誠少助祥刑之治為此
恭摺具

奏叩謝

天恩伏乞

附錄

皇上睿鑒謹

奏

奏謝全史詩函

奏為恭謝

天恩事竊奴才恭奉

欽賞

御製全史詩全函謹設香案望

闕叩頭謝

恩祇領訖欽惟我

皇上觀文成化稽古同天

握金鏡以等百王

運璿機而臨六合茲以

萬幾之餘暇歷覽三古之成編始自龍門舊史
識皇煌帝諦之全功次及孔壁藏書考揖讓征
誅之大局探索左邱之傳因春秋而叅觀魯晉
楚之文披覽涑水之編紀本末而兼及宋元明
之蹟

睿陰載賦

聖訓孔昭本十六字之精一危微

闡寶箴於青簡綜三千年之盛衰升降

資金鑑於丹宸此皆我

皇上學懋緝熙

道光謨烈

蘊日新之德業

宣天縱之知能典謨風雅合一書

特示建中彞訓欽明文思被四表如瞻復旦光
華奴才觀海有心窺天無術恭繹

宸章之垂訓欽承

皇極之敷言每愧入官蒞事夙無學古之功惟
思奉法順流勉贊同文之治為此恭摺具

奏叩謝

天恩伏乞

附錄

皇上睿鑒

謝 賞金盒玉帶頭摺

奏為祇承

賞賚恭摺叩謝

天恩仰祈

聖鑒事竊奴才准經略額勒登保咨稱

欽差副都統銜

乾清門侍衛蘇冲阿至營賚有

御賜奴才金盒一個玉帶頭一個蘇冲阿因奴

才已移師川東相距較遠不及入川見面將

賞件交付額勒登保專差轉送奴才軍營奴才

聞

命之下榮幸難名謹望

闕叩頭謝

恩祇領訖伏念奴才自荷

宸恩棄瑕錄用叨膺師旅再任封疆事事稟

睿謨之訓廸時時邀

聖德之矜全勉竭鈍幸歲大功荷蒙

皇上錄及微勞

特加懋賞晉封伯爵

賞賜

宮銜凡此

聖主稠疊之

鴻施皆屬奴才夢想所不到茲復蒙

欽賜存問

珍賞遠頒祥金範器既荷

寵於

天衢良玉鐫華更增

榮於鞶帶奴才自問何人竟得與經略叅贊共
被

殊恩感激微忱銘心鏤骨奴才惟有與經略叅

贊同心協力將善後事宜迅速妥辦務臻一勞
永逸以冀少報

高厚鴻仁於萬一所有感激下忱理合恭摺叩
謝

天恩伏乞

皇上睿鑒

謝 賞平苗戰圖摺

奏為恭謝

天恩事竊奴才准軍機處發交提塘賚到

御賜平定楚苗戰圖十六幅平定神苗戰圖四幅謹望

關叩頭謝

恩祇領訖洪惟我

國家秉有乾之武廓無外之模四海為家六合在宥曩者乾隆六十年松桃永綏兩處苗民構逆滋事蔓延及於秀山乾州

高宗純皇帝命將徵兵殲除醜類兩軍會合定
籌策以攻心三逆俘擒正刑誅而授首維時奴
才身在行間親觀

者定六師用命真比績於鷹揚羣醜畏威盡聞
風而箠掃至嘉慶二年黔省狎苗不靖奴才仰
奉

廟謨恭行

天罰由關嶺普坪而克捷遂解南籠之圍入洞
洒當丈以擒渠並縛巴林之逆此皆

純皇帝勝算無遺我

皇上福威遠被故得聚殲遺孽永靖邊隅茲蒙
頒賞戰圖布昭

聖武

璿題標首方略即寓於詩中

彛訓裕昆形勢如觀諸掌上
奴才披圖循迹追維

啟佑之謨拜

賜銜

恩載頌

丕承之烈欽佩服感奮莫可名言謹恭摺叩謝

附錄

天恩伏乞

皇上睿鑒

擬平邪教摺

奏爲教匪蕩平疆圉永靖

大功告蒞恭申賀悃事竊查教匪起事之初始
自奸民劉松宋之清劉之協等偽習經咒傳教
授徒愚氓無知偶遭煽惑莠民不靖遂肆矯虔
自乾隆五十九年即與其徒樊學明齊林韓龍
謝添繡等潛謀不軌事經發覺衆犯伏誅而劉
之協逋逃漏網根株未盡芽蘖復萌迨六十年
冬間湖北宜都竹山來鳳之間先後蠢動至嘉
慶元年樊學明之子樊人傑齊林之妻齊王氏

以罪人遺孽勾結兇徒倡彌勒出世之妖言造萬利紀年之偽號陝西四川二省習教之人相繼而起蔓延及於河南維時楚省則有聶傑人張正謨覃正潮等起於宜都縣屬之灌灣腦涼山熊道成陳德本等起於當陽縣曾士興等起於竹山縣楊子敖等起於來鳳屬之小坳旗鼓寨林之華覃加耀等起於長陽縣屬榔坪而樊人傑齊王氏則勾結劉起榮王廷詔姚之富張漢潮高均德張添倫等起於襄陽縣屬之黃龍壩一帶陝省則有馮得仕翁祿玉林開泰王可

秀成自智胡知和廖明萬李九萬等起於安康
縣屬之將軍山大小米溪安嶺汝硎二河等處
川省則有徐天德起於達州屬之亭子鋪王三
槐冷添祿等起於東鄉縣屬之豐城冉文儔起
於通江縣屬之王家寨羅其清起於巴州屬之
方山坪陳崇德起於大寧縣屬老木園林亮功
林定相等起於開縣屬之白巖山龔文玉龔其
位等起於奉節縣屬之鐵瓦寺徐添富龍紹周
徐萬富龔建等起於太平縣屬之城口南津關
一帶該匪等或恃其負隅之勢蟻聚而蜂屯或

附錄

肆其走險之奸狼奔而豕突處

光天化日之下自外

生成本食茅踐土之倫敢為叛逆此教匪滋事之所由起也維時當

高宗純皇帝訓政之年

命將徵兵芟夷醜類楚境則將聶傑人張正謨
覃正潮熊道成陳德本曾士興劉起榮楊子敖
譚貴林之華覃加耀等殲擒陝境則將馮得仕
翁祿玉林開泰王可秀成自智胡知和廖明萬
李九萬等勦滅川境亦將徐添富陳崇德二股

掃除宜乎跳梁之小丑亡命銷聲草竊之奸徒
聞風歛跡乃樊人傑齊王氏王廷詔姚之富張
漢潮高均德等由豫入陝又由陝入川徐添德
王三槐冷添祿冉文儔羅其清之徒與之糾合
偽設元帥先鋒總兵之名妄立黃藍青白線字
之號蔓草未除困獸猶鬪遂因楚氛之惡益增
蜀道之難其時襄陽黃號則王廷詔姚之富齊
王氏樊人傑為首而伍金柱伍懷志辛聰辛文
龐洪勝曾芝秀等為之黨襄陽白號則高均德
張添倫為首而宗國富楊開甲高二高三馬五

王凌高辛斗魏學盛陳國珠等為之黨襄陽藍
號則張漢潮為首而李潮李槐詹世爵陳傑劉
允恭張什冉學勝等為之黨襄陽小藍號則戴
世傑為首而趙鑑崔宗和胡明遠等為之黨達
州青號則徐添德為首而王登廷張泳壽趙麻
花徐添壽汪瀛熊翠熊方青陳侍學等為之黨
東鄉白號則王三槐冷添祿為首而張子聰度
向瑤符曰明劉朝選湯思蛟張簡等為之黨通
江藍號則冉文儔為首而冉添泗王士虎冉添
元陳朝觀李彬楊步青蒲添寶景英等為之黨

巴州白號則羅其清為首而羅其書鮮大川苟
文明等為之黨雲陽月藍號則林亮功林定相
為首而張長更蕭占國包正洪張長青等為之
黨奉節線字號龔文玉龔其位為首而卜三聘
陳得俸等為之黨太平黃號則龍紹周徐萬富
龔建為首而唐大信王國賢唐明萬賴飛隴等
為之黨匪流既衆凶焰益張無藉之徒又乘機
而附合脅從之侶亦久假而成真我

高宗純皇帝震一怒之

天威運萬全之

廟算徵三韓之勁旅集七萃之雄師虎竹分符
龍韜授策采薇采芑頻聞報捷之書獻馘獻囚
屢奏擒渠之績若姚之富齊王氏王三槐羅其
清羅其書林亮功林定相等亦既懸首藁街陳
尸京觀矣然或元凶已翦而餘黨猶存或此界
方安而彼疆又擾遂留未蕝之功以待善承之
聖嘉慶四年恭逢我
皇上親政之初先機獨斷
秉有虔之武

推不殺之仁謂赤子弄潢池之兵固已誤罹於

法而

蒼昊擴覆幬之量終當曲宥其生爰沛

德音魚施勦撫載懸

懋賞並示恩威

御製邪教說以明聖道以靖人心於是彌天之
網一面先開時雨之師三驅必獲申明約束六
師同敵愾之心警覺愚頑兆姓歸作新之化發
帑金而數逾萬萬飛芻挽粟總期士馬飽騰
降璽書而

恩逮元元除稅蠲租益見黔黎鼓舞軍聲由茲

震疊凶黨自此披靡怙終不悛者明正刑誅悔
罪自新者復安生業維時若冉文儔冷天祿張
長更蕭占國包正洪龔其位龔文玉卜三聘龔
建張漢潮李槐李潮詹世爵王登廷高均德符
曰明等皆於數月之間先後殲擒餘衆亦日形
散解凡此烏聚獸散之衆已成摧枯拉朽之形
廼已未庚申冬春之間陝匪則竄逾棧道而蔓
延秦鞏川賊則偷渡嘉陵而擾及潼綿幸仗
天威載揚我

武立申彰輝之令更徵節制之師集團練而民

盡知方繕寨碕而人皆安堵堅壁清野中田無
齋盜之糧築堡防江下民有同仇之義秦隴蜀
棧列卡雲屯白水漢江連營霧布崇山窮谷戎
兵履險而如夷暑雨祁寒士卒習勞而忘倦由
是劉之協逋逃七載終罹法網王廷詔荼毒五
省卒正刑章馬蹄岡之戰冉添元臨陣生擒碑
壻寺之捷徐萬富勦敗伏法伍金柱則夾溝鎗
傷斃命徐添德則仁河淌渡冥誅伍懷志擒於
秦嶺之七十二峪徐添壽獲於中河之石漣山
梁冉學勝於盧家壩成擒龍紹周於盤龍山翦

滅高三馬五在二郎壩同時受縛李彬辛文於
鐵廠坪駢首伏誅張添倫殲於土地堡樊人傑
斃於平口河苟文明之奸猾既在花石崖殲除
蒲添寶之凶頑亦在瓦房溝掃蕩劉朝選於鞋
底山就擒湯思蛟於芝芭口盤獲陳侍學全夥
撲滅張長青率衆歸誠此外如張什王凌高陳
朝觀等在陝境生擒高二楊開甲宋國富陳傑
劉允恭龐洪勝等皆在陝境殲斃陳得俸汪瀛
張子聰冉添泗王士虎辛斗度向瑤辛聰張簡
唐明萬景英等在川境生擒趙麻花鮮大川唐

大信楊步青魏學盛陳國珠賴飛隴等在川境
殲斃趙鑑在楚境生擒張泳壽戴世傑熊方青
等在楚境殲斃其餘黨與歷年擒斬解散者不
可勝計茲當首逆盡除餘氛殆淨秦關楚塞迭
報捷書渝舞巴歌皆成凱唱三省之輯寧同慶
七年之兵火全消此皆仰賴我

皇上勝算先操

聖謨廣運敬

天法

考神機默定於

九重

盱食宵衣決勝不遺於萬里故能昭茲

耆武集此

膚功上承

純皇帝未竟之

貽謀永綏我

國家無疆之

景祚臣等猥以菲材肩斯鉅任發縱皆遵

睿斷纖微悉秉

宸衷茲者掃籙

功成設弓

慶洽馳

九天之露布饒歌千舞遙成九伐之謨靖萬里
之烽烟壤叟衢童齊上

萬年之頌臣等不勝踴躍歡欣之至謹合詞繕
摺恭申奏

賀伏乞

皇上睿鑒謹

奏

籌辦善後章程摺

奏為奴才等籌商裁撤客兵及酌擬留防搜捕章程謹分欸陳奏恭請

聖訓事竊奴才昨在開縣所屬縣埧會合後連日合營一處一面督催鎮將搜捕一面將零匪情形詳加體察正在通盤籌畫間十三日兵部侍郎那彥寶大理寺少卿章煦奉

命來營查看軍務情形并傳示

諭旨詢以餘匪無多何以日久尚未能辦竣是否鎮將等不敷調遣及軍餉有無缺乏各等因

奴才等跼聆之下不勝惶悚愧懼之至伏查三省軍務自上年奏報歲功後餘匪實已無多祇緣連年剿剩之賊伎倆更為狡猾該匪等以老林為藏身之所官兵東來則賊匪西遁官兵南來則賊匪北遁萬山之中路徑紛歧叢林密箐人跡罕到賊數愈少而踪跡愈難搜尋所以不能迅速肅清者職此之故奴才等數月以來督催鎮將認真搜捕雖不能如從前之痛加殲戮而賊勢亦已日勦日少近日奴才等四路查探計老林內餘匪不過一二百人山外零星散匪

不及百人現將官兵分派十餘路無分彼此四路窮搜自可日就肅清但此零星殘孽實無須多兵辦理且以大隊之兵辦此零賊官兵聲勢較大該匪往往聞風先遁此種情形早在

聖明洞鑒之中如此辦理省令一匪不留轉非旦夕可必若不變通其法徒延時日徒費錢糧殊為不值奴才等連日熟加籌畫擬將外省客兵及東三省馬隊全行凱撤酌留本省官兵會同地方文武照緝拏盜賊之法分路防勦如此則兵數既少經費即可大減而兵民協力隨時

隨地搜捕不患不盡絕根株謹將奴才等酌擬章程分款開列恭請

聖訓

一請先撤外省客兵及東三省馬隊以節糜費也查前此三省官兵不下十萬餘名節經奴才等量為裁減此時統計存兵尚有五萬餘名茲陝境已就肅清即老山內遺孽亦已無幾川境腹地全清惟沿邊老林尚有零星之賊未淨然多者數十人少者數人已非老教真賊不過匪類游民附和日久畏死避兵苟延旦夕楚省情

形亦然只須酌留本省官兵分派將備等帶領
協同地方文武隨地搜查即可以資辦理無須
多兵久駐奴才等現擬將東三省馬隊以及外
省客兵全行凱撤以節糜費而示體卹惟領兵
鎮將中有係本省營員而連年帶兵打仗蒙
恩陞補外省營分者此項人員帶兵日久於本
省搜捕情形較熟應請酌選數人暫留調遣以
資得力

一請留本省官兵分路防勦以清餘孽也查此
時餘匪勢極零星若照舊以大隊官兵追勦正

如獅子搏兔費力多而集事難奴才等公同籌議四川酌留本省兵勇一萬二千名分布川東川北湖北酌留本省兵勇一萬名分布歸巴興房二竹一帶令於山內山外四路排搜至陝省雖已寧謐而邊界綿長處處與川楚二省毗連且南山素屬藏奸之藪漢江又為秦豫險要均須酌留官兵防守奴才額勒登保擬於陝省酌留兵勇一萬五千名分布營卡按照奴才等前奏章程常川會哨以絕川楚餘匪竄陝之路是三省如此布置該匪等既不能於老山潛匿而

竄出時到處有兵緝捕不患不盡絕根株至奴才等此番將三省官兵分別留撤之後每月需餉多者五六萬兩少者四五萬兩統計三省約僅需銀十四五萬兩即可供一月之用經費較前大減且零匪日剿日清尚可隨時裁撤以歸節省

一請撤經略叅贊之名以蕝全功也查教匪起事本係內地亂民迨蔓延五省日久不能勦淨仰蒙

皇上天恩頒發經略印信以資統率而專責成

茲邪教首逆悉數殲擒三省地方漸就寧謐惟
深山老林之中一二零星遺孽逋逃未盡其勢
與地方匪類游民無異不值久留大兵奴才額
勒登保受

主深恩至優極渥有一匪未盡何敢遽思息肩
但經略印信在外四方觀聽所繫此時零賊不
過如向來嘯匪之類酌留本省官兵會同地方
文武辦理自可漸次肅清若久留經畧叅贊名
目似非體制奴才等現在寄商德楞泰擬於月
杪月初會合拜發六百里之摺拜摺後德楞泰

即遵

旨進京奴才額勒登保擬將經畧印信先行申
繳以蔽全功此後防守搜捕情形用馬上飛遞
由驛具奏是否如斯恭候

聖訓

一請川陝楚三省分駐大員以資統率也奴才
等分駐官兵之後若僅責成提鎮等辦理恐伊
等職分相等彼此不能駕馭必須有人統率庶
幾呼應較靈川省有奴才勒保督辦陝省已就
肅清所有留防官兵即交興奎賽冲阿楊遇春

統率防勦至楚省現經德楞泰奏明派令鎮將等分段搜捕並調提督慶成前來督辦此時德楞泰尚在楚境將來進京後奴才額勒登保將陝境官兵應留應撤各事宜辦定即親過湖北周歷查閱設川省有應商事宜仍可就近兼顧俟德楞泰回任後其時零賊自己早就肅清奴才額勒登保再行回京供職於歲功大局較為妥善

一請將隨征鄉勇改作綠營餘丁以資鈐束也
查鄉勇一項節次仰蒙

聖主指授機宜奴才等遵照悉心籌議並體察
各勇情形應酌定萬全無弊之法查三省征防
各勇從前不下數十萬節經奴才等隨時裁撤
此時所存僅數十分中之一分內中有家業可
歸者均可送回安業即如近日奴才額勒登保
裁撤川省鄉勇為數甚多均各安靜無事可見
此項鄉勇遣散亦非難事惟現存隨征鄉勇皆
久經戰陣之人曾經出力効命將來裁撤時有
家業可歸者固多而無家業之人亦復不少若
輩既無家業欲議裁撤必先定安頓之法奴才

等籌思日久若以叛產絕產撥給資生則該勇等平素游手好閒者居多非盡皆務農之人必不能自安耕作且產少人多不敷分撥況此項鄉勇遣散後皆欲各回原籍有勇處未必有產而有產處又未必有勇辦理殊多格碍若於鹽井銅廠等處遣令以力謀生則煎鹽鍊銅等事必須素習其業者方能工作鄉勇素非所習銅鹽商人必不願招募且鹽井銅廠本為游民聚集之所再加以曾經戰陣之人雜處其間亦慮桀驁滋事輾轉計議皆非長策惟有令其入營

充伍一法則有錢糧可以養贍有營規可以鈐束又就該勇等各原籍營汛四路分撥其勢散而易制而營伍又得技勇趨捷之人可冀一舉兩得惟查標營制兵均有定額該勇等歸營後一時不能得缺若概作餘丁則例無錢糧該勇等餬口無資終不能久安其身查川省營制經前督臣孫士毅英善宜綿等任內先後奉

旨招募額外存營備戰新兵共二萬三千六百餘名嗣於嘉慶五年六月間奴才勒保察看賊勢已衰無需多兵存營備戰致多糜費當經

奏明通飭各標營凡遇制兵出缺即以新兵撥補新兵缺出即裁缺停募計自五年秋間至今不及三年已裁去新兵一萬一千三百餘名陝省新兵經奴才額勒登保飭令各營撥補制兵現在所存亦屬無幾可見人數雖多裁汰亦非難事現查四川所存征勇六千餘名陝西所存征勇五千餘名即日撤勇時其有家有業情願歸農者聽其回家安業外其無家業而情願歸營者約計兩省不過數千人惟有仰懇

聖恩准其照新兵之例各給守糧一分俟有制

兵缺出隨時撥補旋補旋減約一二年即可均補制兵實額而此項額外守糧亦可裁盡實於安頓鄉勇之法萬全無弊如蒙

俞允奴才等俟零匪辦竣即將該勇等全行裁撤其有業可歸者照格給賞妥送回籍安業其無業可歸情願入伍者即就各勇原籍附近標營分撥入伍停給鄉勇分例改給新兵錢糧楚省鄉勇奴才額勒登保亦札知吳熊光一律辦理如此既不泯其數年征戰之勞亦可免其游蕩生事之慮矣

以上各條款奴才等連日悉心籌議酌擬章程寄信德楞泰相商茲接其覆信意見亦復相同用敢詳悉縷陳恭候

聖裁如蒙

俞允奴才等即當次第分別辦理至奴才額勒登保身受

重恩軍務係屬專責若不辦理完善斷不敢遠思息肩奴才勒保有地方之責更不敢以賊已零星少有鬆勁惟有殫竭愚誠以期諸臻妥善為此合詞恭摺具

奏伏乞

皇上睿鑒訓示

清查軍功摺

奏為清查軍功人等分別給照造冊立案恭摺
奏請

聖鑒事竊查川省自剿辦教匪以來時歷八年
蹂躪地方五十餘處凡軍營打仗則有隨征鄉
勇地方防守又有官招鄉勇及民間自行團練
之勇惟時事起倉卒此項征勇防勇團勇均係
甫經召募之人若無人管帶必致漫無約束是
以擇其中之才力出衆者設立軍功名目每勇
數十人酌派軍功一人以資統率其有禦賊出

力者虛給頂戴以示嘉獎此軍務喫緊之秋為
策勵衆心起見不得不如此權宜辦理之故也
惟是為時既久文武各官未免濫觴其在軍營
始則由提鎮賞給後即有將領各自賞給者其
在地方始則由督撫賞給後即有司道以下等
官亦自賞給者甚至賞及四品五品頂戴殊覺
冒濫過分川省情形如此陝楚二省亦必大畧
相同茲當大功全歲此項軍功人等為數甚多
其原賞文武各員或陣傷亡故或陞調凱旋從
前並未咨報有案以致漫無稽考此時若不詳

悉清查恐啟將來影射之弊但該軍功等出力
日久若因軍務已竣全行追繳恐不足示信於
民且慮衆志驚疑易滋浮議然不加以限制則
從前各路文武所給頂戴為數太多未必盡屬
勞績素著之人況四品五品頂戴體制較優施
之無職平民任意戴用亦非慎重名器之道奴
才現在將川省軍功人等詳加查核如寔係帶
勇日久著有勞績者無論從前何人所賞均由
奴才衙門給予執照其勞績較深者酌給千把
頂戴勞績稍淺者酌給外委頂戴以酬其數年

禦侮之勞即從前給過四品五品頂戴概令更換以符體制其雖曾充當軍功帶領鄉勇給過頂戴而並無勞績可指者槩將原給頂戴追繳以杜冒濫至此項應給執照軍功現在次第查辦統俟辦竣後分別彙造清冊咨部立案准其頂戴榮身設有詞訟到官仍照齊民決罰以免特符滋事倘該軍功等有情願歸營効力者無論何項頂戴均准其由外委拔補如此則於慎重名器之中仍寓鼓舞人心之意似亦善後事宜中之一端再奴才所辦只四川一省所有陝

楚二省軍功應否如此一律清查辦理之處伏
候

聖裁為此恭摺具

奏伏乞

皇上睿鑒

奏報長壽縣士民捐修城工摺

奏為奏

聞事竊查川省重慶府屬之長壽縣向無城郭
嘉慶二年冬間賊匪入境百姓無城可守紛紛
逃散公私屋宇半被燒焚四年十二月該縣知
縣余鈺蒞任董率閭邑士民議築新城舊治瀕
江不可營建遂擇相距十餘里之銅鼓坎地方
因山距險勘定基址估計工費約需銀三萬餘
兩該縣余鈺首先倡捐百姓踴踊樂從該縣稟
報興工捐修自五年七月起至七年十月工竣

稟請查驗前來茲奴才路過該境親加履勘其城由南門向西門繞至北門止計五百八十丈均從平地築砌城身高二丈寬厚一丈由北門向東門至南門止計四百八十丈憑藉山勢崖坎築砌城身高六七尺及一丈三四尺不等寬厚六尺統計周圍一千六十丈內外兩面均係方石砌成高峻堅固城樓海墁一律完全奴才查川省州縣舊無城郭者居多將來善後事宜正擬擇其緊要之區定議建城以資保衛茲長壽縣知縣余鈺獨能於軍務未竣之先董率士

民建造新城所用工費銀三萬一千餘兩皆由
閭邑捐輸並未請帑開銷實屬能事而該境士
民急公向義亦堪嘉尚可否仰懇
聖主量予施恩以示鼓勵之處出自

鴻仁為此恭摺奏

聞伏乞

皇上睿鑒

奏海口工程

奏為遵

旨復奏並將海口水勢工程據實直陳仰祈

聖訓事竊臣等欽奉

上諭該督等稱海口北岸無人烟之境現在堤
裡堤外兩面皆水低窪之處水高於堤所有該
處工程應俟秋間黃水消落時相機辦理等語
黃水併力東注方能刷沙豈可任其漫溢旁趨
上年堵築馬港口工程南北兩岸新堤一律培
築況北岸地勢較高何以轉有漫溢之水該處

附錄

過堤之水係由何處漫越現由何處經行是否
別有歸海之路抑仍繞歸正河入海該督等俱
即據實奏聞等因欽此 臣等跪誦之下仰見我
皇上睿照如神 臣等不勝欽服竊 臣勒保向來
不諳河務本年蒙

恩簡任兩江二月間在清江浦接印任事即與
臣陳鳳翔將南河水利反覆講求覺從前南河
諸臣請築海口新堤及堵合馬港口等事皆非
長策緣黃河舊日工程至雲梯關而止雲梯關
以外即為瀕海沙灘不復築堤建壩伏讀乾隆

四十五年所奉

純皇帝聖旨有二套以下由北潮河入海之處
路捷勢順設遇漫溢正可分洩盛漲俾尾閭益
得暢遂不必添建閘壩雲梯關以外原不必與
水爭地等因欽此欽遵在案煌煌

聖訓實屬思深慮遠可為萬世之法當時大學
士阿桂會同河臣薩載即將二套以下馬港河
東灘地應徵地畝錢糧奏請豁免是雲梯關以
外皆置為閑曠之地以為河尾宣洩之路無所
用其堤防保護也當時

附錄

聖旨所指北潮河入海之處即馬家港下注之水是馬家港支河亦留為分洩黃流之路無所用其堵閉也近年籌河諸臣皆執禹貢同為逆河之義謂海口之水宜合而不宜分因請將旁洩之路皆行堵閉又執靳輔東水攻沙之說請築新堤逼溜入海殊不思禹貢同為逆河之上尚有播為九河一語可見黃河至入海之處水勢浩瀚非一路可容而向日王家營之減壩馬家港之支河以及峯山四閘等皆合於古聖播為九河之義非可概行堵閉也至於上年所築

海口新堤尤未妥協查雲梯關外之地盡屬沙灘土性不能膠固且築堤時並未將堤之根脚刨土夯礮又未立椿挂埽止於沙上加沙堆成長堤二道堤身低矮僅七八尺之高海灘地勢本有窪窪去年築堤時正河無水新堤不覺有高矮之異及馬港口堵閉之後黃水挽歸正河兩邊漫水侵堤水勢平而堤之高矮遂見高處尚未平堤而低處已形漫溢此海口新堤無益之實在情形也又新堤南岸至宋家尖而止北岸至張家社而止其下仍無堤防而大淤尖三

十里之積沙正當其冲夫以黃河數千里下注之水既出雲梯關東在兩堤之間又為積沙當其去路其不能宣暢可知矣本年春間桃汎之時黃水漲發即從倪家灘溢出汎濫堤外葦蕩而注入余本套支河入海查倪家灘即在北堤之尾黃流既盛堤內勢不能容因從堤尾繞出堤外由是堤之兩面皆水而堤根亦為冲刷殘缺伏汎時黃水益大於是上十套下十套二處皆有漫水蓋堤高七八尺漫灘之水但至八九尺以上即可漫堤是以地勢高處堤尚高出水

上地勢低處堤即沒入水中夫他處河堤立椿
挂埽加土夯碇尚有蟄塌之患今以無椿無埽
之一綫單堤魚之沙性粗鬆而欲其與水力爭
其不可恃又可知矣此又新堤難守之實情也
自新堤既築馬港口堵閉以來將逾半年束水
攻沙之法可謂極矣而海口之淤如故可見築
堤束水以冀攻沙之效其事實未可操券也近
五月初黃水增長較去年五月之水大至五尺
一寸積至二十三日不消遂由王營減壩漫溢
旁注推原其故實由海口逼緊水無他路可行

故生下壅上潰之患臣等自春入夏刻刻以此為慮而所以不敢早陳於

聖主之前實因臣勒保初到江南於河務素無閱歷臣陳鳳翔亦纔調南河於宣防利害未敢十分自信且大工甫竣之後不便遽生異議竊冀伏秋二汛幸保平安萬一海口亦漸有疏通之機即不必又議更張今以王營減埧漫口情形而論則海口新堤及馬港口之堵閉實屬錯誤臣等受

恩深重何敢復因循瞻徇致悞事機就臣等愚

昧所見將來秋深水落之後王營減堤係在雲梯關內且該境有田廬場灶不得不加修築然漫口堵合之後仍須將減水石堤修好以備將來分洩盛漲之路其海口新堤則請但保護南堤以衛下河州縣其北堤竟無庸修築以免逼水之患蓋該境東北均係沙灘湖蕩竟可任水之所向但以下游通暢為主不必拘定更令擇路而行至於馬家港支河仍須啟放俾黃流盛漲時分溜下注北潮河入海以復乾隆四十五年之舊規臣等連月籌議意見久已相同然採

訪羣議有以為然者尚有不以為然者惟是河
工要務為民生

國計所關臣等既有所見不敢不據實直陳為
此合詞覆

奏伏乞

皇上睿鑒謹

奏

辦理團練摺

奏為川省辦理團練酌定經費章程仰祈
聖鑒事竊照川省教匪滋事以來蔓延數十州
縣仰仗

皇上天威將士用命擒戮渠魁殲除黨羽近來
所剩僅係零星餘孽節次欽奉

諭旨飭令地方官督率團寨協同搜捕是以奴
才於上年冬間與經略額勒登保叅贊德楞泰
會商大局後即委道府丞倅等官會同地方牧
令分段派委佐雜等員督率團勇寨民同心協

力共掃餘氛數月以來各段委員督率團勇遇賊截剿有擒獻賊目者有殲戮賊匪者辦理頗有成效現在賊匪無容足之地兵氣日揚賊氛日淨此皆

聖主德威所播淪浹人心故閭閻共切同仇實心効命但向時百姓堅壁清野不過自保身家未便官為資給此時既委官管領團勇出寨擊賊勢難令其枵腹從事其有殲擒賊匪者必須隨時獎賞以示激勸間有受傷陣亡之人皆係因公死事更應量給醫藥埋葬之費以示

朝廷矜卹至意即各段委員試用無缺者居多亦不能不酌發經費以資辦公奴才節據辦理團練之道府丞倅等稟請前來當即飭司查議去後茲據藩司楊揆臬司董教增酌議條款具稟到營奴才覆加核定謹繕具清單恭呈御覽如蒙

俞允則經費有資民心定必益加奮勉實於善後事宜大有裨益惟查歷次用兵並無團寨剿賊之事此項經費皆軍需舊例所無今若在軍需正項支銷於定例勢難准行查川省現有已

派津貼銀兩原以補經費之不足近蒙

聖恩即次賞撥餉銀正項已為充裕此項津貼銀兩本係百姓捐輸之項辦理團寨需費無幾請即於津貼項內動撥支發所需口糧亦以銀照時價折給如此以川西南無事州縣樂輸之資為川東北有事州縣急公之用於情理亦屬平允事竣仍彙造清冊咨部查核以杜冒濫之弊為此恭摺具

奏伏乞

皇上睿鑒訓示

一團勇出寨打仗宜酌給口糧以示體恤也查現在各委員分管寨硐每寨挑選團勇一二百名或二三百名不等造具花名清冊呈報此項鄉勇無賊時各有生業自不必官給口糧若賊匪竄近出寨剿捕勢難令其枵腹効命應請於出寨剿賊之日按名給發口糧一升不給鹽菜所需米石即照時價折給一經回寨即行停止以歸撙節

一團勇打仗遇有傷亡宜分別酌給卹賞以示矜恤也查寨硐居民本係自衛身家今既責令

打仗殺賊遇有陣亡受傷者理應酌給埋葬醫藥之資以示矜恤但團勇究與常川隨征之鄉勇有間未便遽照征勇傷亡之例議給應請量為酌減團勇遇有陣亡者每名酌給埋葬銀十兩受傷重者每名酌給養傷銀四兩受傷輕者每名酌給養傷銀二兩均由各總理之員查實給發隨時報局查考

一團勇擒殺賊匪應酌定賞格以資鼓勵也查上年奴才與額勒登保商辦團練原曾酌定賞格分別擒獻招降等項頒發各碉寨遵行此時

川省賊匪衰殘已極毋庸再為招降至寨勇能將賊匪殺斃生擒者理應仍加獎賞以資鼓勵應請酌定章程凡寨勇擒賊一名賞銀二兩殺賊一名賞銀一兩擒獻賊中小頭目一名審訊得寔賞銀五十兩如能擒獲著名首逆另行遵照

欽頒賞格給發

一辦理團練各委員應酌給月費以資辦公也查此次辦理團寨所派委員人數較多各委員多係試用無缺之人既無俸薪養廉其隨從丁

役又無口糧塩菜微末窮員未免辦公竭蹶應
請量給月費收令每員月給銀三十四兩伍雜
每員月給銀二十四兩俾資本身及丁役食用
之需